



Minggu, 11 Agustus 2024
Ogen: Pengerana 9:10



Erdahin Asa Gegeh



Erdahin, sada perbahanen si banci ndatken ulih si erguna man diri sendiri bage pe man sekelewet. Ulih pendahin e banci inanami enterem jelma. Umpamana erjuma, ulihna mereken nakan ras pangan si sehat man sekelewetna, erbinaga ulihna nampati kalak murah ndatken kai siiperlukenna amin gia nukur. Ertukang, nampati kalak majekken rumah entah sapo ingan cicio, mpekena rumah si ceda. Ngajar, mbuka wawasen ras pemeteah man anak muridna ras sidebanna. Penungkenen, engkai maka perlu erdahin? Lit kalak erdahin gelah ncukupi keperluan geluh, enda me idealna. Lit kalak erdahin gelah mehaga, janah lit kalak erdahin gelah banci nampati kalak sideban. Siapai pe enda alasenna, si perlu tetaplah erdahin.

I bas kitab Pengerana e, mpersingeti kita gelah erdahin asa gegeh tupung lit denga kesempatan, sabap nggeluh enda la ndekah. Lit doni kematen, janah ku je me perlawesta. I je pagi lanai banci rukur apai ka erdahin. Tupung kita ringan denga i bas doni kegeluhen, pakeken kesempatan e lako erdahin. Situhuna Jesus pe em si iajarkenNa janah ipraktekkenNa. Jesus erdahin mereken penampat man kalak sideban, isampatina kalak sakit, mulahi perbeben kalak si melala perbebenna. Jesus labo isuruh lebe maka erdahin, Ia ndarami dahin guna nampati sekelewetNa.

Labo ndekah kita nggeluh, tupung lit denga kesempatannta, erdahinlah. Janah Enggo perlu sipekena perayakennta i bas erdahin, lanai terjeng cari makan entah nambahi erga diri. Erdahin e sada pendilo, gelah erguna man kalak sideban. Kita erdahin gelah lit asamta nampati kalak sideban. Jadi erdahin labo beban, tapi keriahen sabap kita jadi pasu-pasu.

➤ Jadilah pasu-pasu tupung lit denga kesempatan